

**Badische Landesbibliothek Karlsruhe**

**Digitale Sammlung der Badischen Landesbibliothek Karlsruhe**

**Meditationum evangelicarum volumen tripartitum**

**Creidius, Hartmann**

**Francofurti ad Moenum, 1682**

De secundo

[urn:nbn:de:bsz:31-122776](https://nbn-resolving.org/urn:nbn:de:bsz:31-122776)

III. *Gladio opulencia*, & ducit ipsum in montem excelsum, ubi omnia totius mundi regna ἐν σιγμα ἡγεμονίας, ut Lucas notat c. 4. v. 5. ipsi monstrat, & hæc omnia, inquit, tibi dabo, si prostratus adoraveris me. Hæc magna erat Satanæ impudentia, quare Christus ipsum divina virtute abigit, dicens! Apage Satan, scriptum est enim: Dominum Deum tuum solum adorabis, & illi servies, Deut. 6. v. 13.

Hoc idem Diabolus etiamnum audet in omnibus hominum ordinibus. In Ecclesiastico apud eos, qui mundo placencia prædicant. In Politico apud eos, qui fidem datam violant. In œconomico apud eos, qui proximum defraudant in contractibus ut ditescant: Hi omnes Diabolum adorant, & regna mundi verbo Dei præferunt, quod maximè cavere debemus. Quid enim prodest homini, si universum lucretur mundum, & animæ detrimentum patiat? Matth. 16. v. 26.

Quod si igitur Satanæ aureos hosce montes in speculo suo tibi ostendat, & ad apostasiam te sollicitet, responde cum Christo: Vade post me Satan, promissis tuis aureis nihil apud me efficies. Poculum tuum Babylonicum aureum est, sed plenum fornicationum, Apoc. 17. vers. 4. fallacia sunt & momentanea quæ promittis. Nam quicquid in hoc mundo est, σκῆμα est, 1. Cor. 7. vers. 31. πολλὴ φαντασία, Act. 25. vers. 23. stercus & vermis, 1. Macc. 2. vers. 62. pecunia tua tecum sit in perditionem, Actor. 8. vers. 20. Ego Deum meum adorabo, & ei soli serviam. Nam merces ejus cum eo, & opus illius coram illo, Esai. 40. vers. 10.

## De Secundo.

SEquitur *victoria consequentia*, quæ penes Christum est. Nam postquam ternâ vice Diabolum gladio Spiritus represserat, palmam tandem obtinet, quæ duplici effectu hic describitur, quorum

I. Est *Diaboli precipitium*. Nam mox ubi Christus ipsi discessum præcipit, discedere cogitur. Nam ipse est fortior, qui fortem armatum superare potest, Luc. 11. v. 22.

Nos verâ cordis fiducia ipsi adhæreamus, & victoriam, quam tulit hic à Diabolo nobis applicemus. Nam in Christum Diabolus nihil juris habebat, Joh. 14. v. 30. impugnando igitur Christum amisit jus suum, quod propter peccatum in nos habebat, quia victoria Domini est servorum triumphus, ut Hieronymus loquitur. Propter illum nos quoque vincimus, Rom. 8. v. 37. & fides nostra est victoria, quæ vincit mundum, 1. Joh. 5. v. 4. Deinde gladium Spiritus ad manus sumamus, quod est verbum Dei, Ephes. 6. v. 17. Tertio diligenter oremus, Matth. 26. v. 41. si ita resistimus Diabolo, fugiet à nobis, Jac. 4. v. 7.

II. *Angelorum servitium*. Nam Angeli accedebant, inquit Evangelista, & serviebant ei. Sic Deus tentationes mitigat, & lætum concedit exitum. Nam fidelis est, & neminem sinit ultra vires tentari, sed dat ἐκβάσιν, scribit Paulus 1. Cor. 10. v. 13. Si unus Diabolus te oppugnavit, decem Angeli postea tibi servient, & tam de superata tentatione, quam coronæ destinatione tibi gratulabuntur. Sunt enim πνεύματα λειτουργικά, missi in ministerium propter eos, qui hæredes erunt salutis, Ebr. 1. v. 14.



# Dominica Reminiscere.

*Evangelium Matth. 15. v. 21. 28.*

**C**Um Patriarcha Jacob ex Mesopotamia rediret, & traductis uxoribus ac liberis suis per vadum Jacob ardentissimis precibus Deum invocaret, ut à manu Esavi ipsum liberaret, qui armato milite ipsi in occursum properabat, ecce vir quidam luctabatur cum eo, usque ad auroræ exortum. Sed vicit tandem Jacobus, & novum nomen propter victoriam illam adeptus est, Gen. 32. v. 24.

Lucta hæc Jacobi cum filio Dei est imago luctæ illius spiritualis, quam omnes illi Israëlita, id est, verè Christiani quandoque sustinere coguntur in tentationibus, quas ipsis Deus immittit ad probam fidei, cujus exemplum nobis proponitur in hodierno Evangelio. Sed quemadmodum Jacob tandem vincit per fidem & orationem, Os. 12. v. 4. & novum propterea nomen reportat, quod non amplius Jacob sed Israel debeat appellari, quia cum Deo & hominibus luctatus erat, Genes. 32. v. 28. Ita vincit etiam Cananæa tandem; & gloriam reportat. O mulier magna est fides tua, fiat tibi sicut vis.

Nos totum ponderabimus Evangelium, quod duabus potissimum partibus absolvitur.

*In I. Describitur Conflictus.*

*In II. Eventus.*

J. J.

## EXEGESIS.

**P**etrus mulierem vocat vas fragile 1. c. 3. vers. 7. sed præclara tamen facinora consignavit Scriptura, quæ à mulieribus perpe-

trata sunt, Judic. 4. v. 21. Judic. 13. v. 5. seqq. His omnibus præstat Cananæa. Nam Jaël, Judith, & cæteræ homines vicerunt, sed Cananæa Christum vincit invincibilem admirabili conflictu, cujus descriptionem accuratius intuebitur.

Occurrunt autem

1. *Temporis notatio*, quando factum sit, nimirum post acrem illam cum Pharisæis & Scribis disputationem de Traditionibus humanis, quas tanti aestimabant ipsi, ut propter eas mandata divina transgredi non dubitarent. Quia enim fideli suâ informatione nihil proficiebat, sed furorem potius hostium suorum magis magisque accendebat, Galilæam relinquit, & per fugam ex oculo hostium se paulisper subducit.

Docemur nos hoc exemplo, cum hostes veritatis certam persequuntur personam, fugam esse licitam. Nemo enim propriam carnem unquam odio habuit, Ephes. 5. vers. 29. in primis hic Christi secessus speculum nobis præbet Ecclesiæ, quæ ambulatoria est in his terris, & ad certum locum non alligatur, cujus typus fuit in V. T. tabernaculum portatile, quod ex uno loco in alium transferebatur, Exod. 25. vers. 14.

2. *Loci specificatio*, ubi factum sit, nimirum in finibus Tyri & Sidonis, quo Christus ex Galilæa secesserat. Hoc ipso præludium quasi fecit rejectionis populi Judaici, & vocationis gentium, de qua sæpe hæcenus ipsis concionatus fuerat, in primis Matth. 21.